



Udruženje Žrtava i Svjedoka Genocida

Ulica	Vilsonovo šetalište 10/2, 71000 Sarajevo, BiH
Tel. – Fax	+387 (0)33 211 340
Web – Email	www.tortura.com.ba - info@tortura.com.ba udruzenje.zrtava.torture@gmail.com
ID broj	4201644760006
Račun	1346631006994478 - ASA Banka



Udruženje

Pokret "Majke enklava Srebrenica i Žepa"

71000 Sarajevo, Nedima Filipovića 17, tel./fax: +387 (0) 33 610 801, tel.: 522 266
e-mail: srebrenica.zepa@bih.net.ba

Broj: 142/2026

Datum: 16.07.2026. godine

OHR

N/R VRŠITELJA DUŽNOSTI VISOKOG PREDSTAVNIKA,
GOSPODINA LOUISA J. CRISHOCKA

PREDMET: REZOLUCIJA SABORA REPUBLIKE HRVATSKE

Poštovani,

Obraćamo Vam se povodom rezolucije Hrvatskog sabora i deklaracije svesrpskog sabora usvojene u skupštini Srbije – poziv na zaštitu ustavnog poretka Bosne i Hercegovine. Imajući u vidu složenost uređenja Bosne i Hercegovine, te njen geopolitički položaj i kontinuirane pokušaje prisvajanja njene teritorije od strane susjednih zemalja (Srbije i Hrvatske) što je kroz presude prepoznao i Međunarodni Krivični Sud za bivšu Jugoslaviju (MKSJ).

Pozivajući se na rezolucije Evropskog Parlamenta iz 2005., 2009., 2014., 2018., i rezolucije Generalne Skupštine UN- a iz 2024., te rezoluciju Vijeća Evrope iz 2025. u kojima se poziva na presude MKSJ, kao i poštivanje teritorijalnog kontinuiteta BiH.

Izražavamo ozbiljnu zabrinutost zbog političkih poruka i ciljeva sadržanih u rezoluciji Hrvatskog Sabora o Bosni i Hercegovini i deklaraciji svesrpskog sabora Republike Srbije i Republike Srpske.

Iako se oba dokumenta formalno pozivaju na poštivanje Dejtonskog mirovnog sporazuma i teritorijalnog integriteta Bosne i Hercegovine, njihovi politički zahtjevi predstavljaju ozbiljan pokušaj uticaja na unutrašnje ustavno i političko uređenje suverene države Bosne i Hercegovine.

Rezolucija Hrvatskog sabora zagovara institucionalna rješenja koja podrazumijevaju izmjene izbornog sistema Bosne i Hercegovine u skladu s političkim zahtjevima jedne etničke politike, dok deklaracija svesrpskog sabora afirmira koncept jedinstvenog

srpskog političkog prostora, posebno povezivanje Republike Srpske sa Republikom Srbijom i kontinuirano jačanje nadležnosti entiteta, uz višegodišnje javne blokade i pozive predstavnika vlasti Republike Srpske na otcjepljenje od Bosne i Hercegovine.

Tražimo da se ove političke inicijative osude u okviru činjenica koje su utvrđene u pravosnažnim presudama Međunarodnog Krivičnog Suda za bivšu Jugoslaviju. Tribunal je kroz više presuda utvrdio međunarodni karakter rata u Bosni i Hercegovini, učešće državnih struktura Republike Hrvatske i tadašnje Savezne Republike Jugoslavije, kao i postojanje odvojenih udruženih zločinačkih poduhvata, čiji su politički ciljevi uključivali teritorijalnu podjelu Bosne i Hercegovine na etničkoj osnovi.

Upozoravamo da pojedini politički ciljevi sadržani u njima mogu biti shvaćeni kao nastavak dugoročnih nastojanja da se kroz političke, institucionalne i diplomatske mehanizme ostvari odlučujući utjecaj na ustavno uređenje Bosne i Hercegovine. Upravo zbog historijskog iskustva i pravosnažno utvrđenih činjenica, ovakve procese nije moguće posmatrati kao uobičajena politička pitanja.

Pozivamo Ured Visokog Predstavnika (OHR), kao konačni autoritet za tumačenje civilnih aspekata Dejtonskog mirovnog sporazuma, da pažljivo razmotri političke i pravne posljedice ovih dokumenata te da, u okviru svojih nadležnosti, spriječi svaki pokušaj podrivanja suvereniteta, ustavnog poretka i funkcionalnosti institucija Bosne i Hercegovine.

Istovremeno, pozivamo Evropsku Uniju, Vijeće za provedbu mira (PIC), Ujedinjene nacije i sve države potpisnice Dejtonskog mirovnog sporazuma da sa posebnom pažnjom prate političke procese koji mogu ugroziti stabilnost Bosne i Hercegovine i regiona. Smatramo, da je očuvanje suvereniteta, teritorijalnog integriteta i ustavnog poretka Bosne i Hercegovine temeljni preduslov trajnog mira, sigurnosti i zaštite dostojanstva svih žrtava ratnih zločina. Iskustvo iz devedesetih godina obavezuje domaće institucije i međunarodnu zajednicu da pravovremeno reagiraju na politike koje mogu dovesti do produbljivanja podjela i ugrožavanja mira.

Nikada više ne smije biti dopušteno da politički projekti koji dovode u pitanje suverenitet i teritorijalni integritet Bosne i Hercegovine ostanu bez pravovremene i odlučne reakcije međunarodne zajednice.

S poštovanjem,


Murat Tahirović
Udruženje žrtava i svjedoka genocida

Predsjednica Udruženja Pokret Majke enklava
Srebrenica i Žepa
Gđa. Munira Subašić

